

UPA2026/64: ”Meeqqat aturfiani klassimi ataatsimi annerpaamik 18-inik atuartoqarnissaanik qulakkeerisumik inatsimmik atortuulersitsinissamik, Naalakkersuisut peqquneqarnissaannik Inatsisartut aalajangiiffigisassaattut siunnersuut.”

(Demokraatit Inatsisartuni eqimattaa)

UPA2026/143: ”3. aamma 7. klassimi alloriarfinni allattariarsornermi pinngitsuugassaannigitsunik misilitsissutinik qitiusumit aalajangersarneqartunik atorunnaarsitsissallutik inatsisinut, malittarisassanullu allannguutinik pisariaqartunik saqqummiussinissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsisit, malittarisassallu ukiumi aturfiusumi 2027/28-mi atuutsilersinneqarsinnaanngorlugit naammassineqassapput.”

(Demokraatit Inatsiartuni eqimattaa)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Aappassaaneerinnineq

Demokraatit Inatsisartut eqimattaani ilaasortanit aalajangiiffigisassatut siunnersuutaat Naalakkersuisut qutsavigivaat.

Naalakkersuisut Inatsisartut UPA2026/64-mik aamma UPA2026/143-mik suliaqarnerat kiisalu siullermeerneqarneranni partiit oqaaseqaataat qujassutigivaat. Naalakkersuisut meeqqat aturfiani atuartut ilikkariartornerat, atugarissaarnerat atuartitsinerullu pitsaassusaa qitiutillugit suli ineriartorteqqinneqarnissaanik pisariaqartitsineq politikikkut annertuumik isumaqatigiissutaasoq kiisalu nunatsinni pissutsit aallaavigalugit aaqqiissuteqarniarnerit maluginiarpaat.

Naalakkersuisut ataatsimiititaliap isumaliutissiissutaa tusaatissatut tiguaat aammalu klassini atuartut amerlassusiinik alloriarfinnilu misiligutinik allannguiniarnerit pædagogikkikkut, ulluinnarni atukkatigut aamma aningaasaqarniarnikkut kingunerisassaasa annertunerusumik erseqqissarneqarnissaannik ataatsimiititaliap pisariaqartitsinera maluginiarlugu. Tamatumunnga peqatigitillugu ataatsimiititaliap oqaaseqarnerat nuna tamakkerlugu unammillernartut allanngorartumik atuuttut, taamaattumillu aaqqiissutissat siunertaqarluartumik ilisimasatigullu tunngavissaqarluartumik suliarisariaqartut Naalakkersuisut maluginiarpaat.

Taamatuttaaq ataatsimiititaliami amerlanerussuteqartut Naalakkersuisut inassuteqaataata akuerineqarnissaanik inassuteqarnerat, aammalu suliap ingerlateqqinnerani soqutigisaqartut suliamut tunngassuteqartut peqataatinneqarnissaasa pingaaruteqarneranik isumaliutissiissummi erseqqissaateqarnerat Naalakkersuisut maluginiarpaat.

Tamanna tunngavigalugu Naalakkersuisut allannguutissatut siunnersuut akuerineqassasoq inassutigaat.